

www.BibleForChildren.org

Mateus 1




Elisabet iapa ngan aea taiko lima ga ede, be Deo isula anggelo Gabriel ga ila ngan tuanga ede ieda Nasaret ngan tibur kapei Galili. Ta ila pan taine blala ede toa ilup toman ngan eaba eta maitne. Taine toa ne, tisio ei ngan oainga eaba ede ieda Iosep ngan iaoa keledede pan Devit. Taine blala toa ne ieda Maria.



Be anggelo ikeo pan bedane, "Maria,
eao mataud mao. Ngansa Deo ilolo
marum ngan eao. Ega, eao ga apam
ta popo gergeu aranga, ta eao ga
oato ieda Iesus. Ei ieda ga
iuot kapei, ta gid panua ga
tiuato ei gergeu aranga ton
Deo Gadae Tau. Be Maron
Deo ga ibada itub Devit ele mul
maron aea ga ila pan. Ta ei ga
imadid ga imugamuga ngan gid
iaoa keledede pan Iakop somisomi,

ta ele naurata maron aea ga
irangrang ngan kus mao."



Be Maria ikoli anggelo ele posanga
bedane, "Danga toa ne ga iuot
madongan? Ngansa gau nalup
toman ngan eaba eta maitne."
Ta anggelo ikoli ele posanga
bedane, "Itautau Tutui
ga isulug ga inam pago,
ta Deo Gadae Tau
iura kapei ga irobi
go. Tota gid panua
ga tiuato gergeu
tutui toa eao ga

popo ne ei
Deo Inat."




Ngan ado toaiua, Maria idae manmanae ga
ila ngan tuanga ede ienono bereoeai
ngan tibur kapei Iudea.
Toa eoa ila idudunga
Sekaraia ele lumaeai
ta ikeo "ado kemi"
pan Elisabet.




Be ngan ado imata toa
Elisabet Iesus Kristus aea
poponga iuot ga bedane: Itna
Maria, tisio ei ngan oaininga
Iosep. Gisirua tilup maitne,
be tigera Maria iapa.
Eine ngansa ngan
Itautau Tutui iura,
Maria iapa. Be
iadaoa Iosep ei eaba
tutui, ta itin ngan
ipamaeamaea Maria
panua busa matadeai
mao. Tota iuangga
itnan ei mumulnga.



Iosep imata nanan kadonga toa ne maitne, be mole mao, anggelo ton Maron iuot pan ngan ianun ta ikeo bedane, "Iosep, eao iaoa keledede pan Devit, irangrang ngan lolom ede ga ede ngan badanga Maria ga iman adaoam mao. Ngansa gergeu toa iapa ngan oa, eine Itautau Tutui ibada pan."



"Ei ga ipopo gergeu aranga, ta eao ga oato ieda Iesus, ngansa ei ga ibada ele panua mulian ngan led kadonga sasat." Iosep ieno ga idae ta ila ikado mambe anggelo ton Maron irenren pan ngan. Iuai Maria toa, be gisirua tilup mao ga irangrang ngan ipopo gergeu aranga. Ta iuato ieda Iesus.



Ngan ado toaiua, Kaisa Ogastus ei maron kapei ngan
tibur toa ngada oa Rom, be idol ele apu kapei ede
ngan badanga panua toa
ngada oa edad ga idae
ngan laulau.




Tota panua toa ngada oa tiluagid mulian ad tuanga
ipuiai ngan tibode edad. Be Iosep pade itnan tuanga
Nasaret ngan tibur kapei
Galili ta ila ngan tibur
kapei Iudea ngan
tuanga Betleem,



toa mugaeai maron kapei Devit imamado ngan.



Ikado bedaoa ngansa ei iuot ngan iaoa keledede pan
Devit. Tota gisirua Maria tila ngan dolnga edad
ga idae ngan laulau pade.
Maria toa, tisio ei ngan
oainga Iosep,
be iapa.



Gid timamado Betleem
maitne be Maria imata
boloma ngan poponga.



Tota ipopo ele gergeu lautabe aranga ta imol ei ngan
malo ilia mamarae ta ipaeno ei ngan gid bulmakao ad
golomada, ngansa luma kaluae
aea iuon tau ngan
gid panua.



Be boloma ngan tibur toa oa, gid panua edengada
timamado saupuiai be timariala ngan led sipsip
bong. Mole mao, anggelo ton Maron

iuot pagid,
be taranga
ton Maron
ibaliu ngan
gid.



Ta timataud
kapei tau.



Be anggelo ikeo pagid bedane, "Amataud mao. Ega,
gau natal ato kemi ga inam pagimi, ta ikado ga gim
panua toa ngada ne tinimi igelgel.

Eine ga
bedane:
Labone
ngan Devit
ele tuanga,

taine ede
ipopo gergeu
aranga."




"Gergeu toa ne eine Kristus ami Maron toa ibada gimi mulian. Be gimi ga aoatai ngan ei ngan kilala ga oaine: Gimi ga agera gergeu ede timol

ei ngan
malo ilia
mamarae
ta ienono
ngan gid

bulmakao ad
golomada."



Be mole mao gid anggelo iaoa kapei
ede buburiai aea per ga tiuot toman
ngan anggelo toa oa.



Gid tisoa Deo ieda ta tikeo, "Tasoa Deo ieda toa
imamado gadae tau! Be gid panua tanoeai
toa Deo itin igelgel ngan gid, eine
ele kadonga



lolo tarui aea
idio pagid."



Gid anggelo titnan gid ga tila buburiai
ga kus, ta gid panua toa timariala ngan
sipsip oa tiposa pol ngan gid ta tikeo,
"Toa patautene tala Betleem ta tagera
danga toa Maron ipalongo
gita ngan!"



Tota manmanae ga tila ta tigera Maria
ga Iosep ga gergeu toa ienono ngan gid
bulmakao ad golomada. Tigera ei ga kus,
tota tipaoasasa angelo ele posanga ngan
gergeu toa ne.




Ngan ado toaiua,
Erot iman maron
kapei, be Iesus itna
ipopo ei ngan tuanga
Betleem ngan
tibur Iudea.



Itna ipopo ei ga kus ta gid
kapepei edengada ado ele
parangai ad tinam tiuot
Ierusalem. Gid led oatainga
kapei ngan gigima iman kilala.



Tiuot Ierusalem ga
kus ta tibetabeta
alele bedane,
"Gergeu pau toa
muriai ga iuot
maron kapei



togimi Iuda, ei imamado sida?
Ngansa gai amado ado ele
parangai, be agera gigima iman
kilala ngan aea poponga. Ta gai
anam aoangga asoa ieda."



Erot ilongo bedaoa ga kus
ta ipaoen posanga
mumulnga ga ila pagid
kapeipei oatainga ad,
ngan tila pan. Ta ibeta
gid bedane, "Gigima toa
gimi agera na iuot ngeda?"



Ilongo kemi led posanga
ngan ga kus ta isula gid
ga tila Betleem ta ikeo
pagid, "Gimi ala Betleem
ta amarum ngan ilonga
gergeu toa oa. Be oangga
gimi aot ngan ei, anam
apalongo gau. Ta gau
pade nala nasoa ieda."



Io, tilongo Erot ga kus ta tila. Be mole mao gigima toa
mugaeai tigera ado ele parangai, iuot pade be imuga
ngan gid ga ila imadid tutui ngan
tibur toa gergeu ienono ngan.
Ta gid tila lumaeai ta tigera
gergeu toa oa toman ngan
itna Maria. Ta
tikor aed ga tidol
laborad ga isulug
tanoelai pan
gergeu ta
tisoa ieda.



Ta tipokaka led apou ta tibada led tenainga ga
iuot. Gid tipan ele gol, ga nabene, ga abei mer itekea
kemikemi. Be ngan anunud Deo ipabib
led ngan tiluagid mulian pan
Erot mao. Tota tinasi edap
ede pade ta tiluagid ga tila
led tuangai.



Gid kapeipei oatainga ad
tiluagid mulian ga kus, be mole
mao anggelo ton Maron iuot
pan Iosep ngan ianun ta ikeo,
"Eao dae ta bada gergeu
toman ngan itna, ta gimi
tol aeaoa ga ala Isip. Ta
amamado toa eoa ga
irangrang ngan naposa
pago pade.

Ngansa Erot iuangga ilo
gergeu toa ne ta
ipaeabu ngan ei."



Tota bong maitne, Iosep idae
ta ibada gergeu toman ngan
itna ta tiaoa ga tila Isip. Ta
tidio toa eoa ga irangrang
ngan Erot imate. Danga toa
ne iuot ta iparangrang
Maron ele posanga
mambe eaba ibada Deo
iaoa mugaeai ikeo ngan
bedane,


"Gau nababa natug ta
itnan tibur Isip ga inam."




Erot isanga gid kapeipei
oatainga ad ga mao, ta iuatai
mambe tipakaka ei, ta ilolo
bake paeamao tau.




Tota isula ele panua paraunga
ad ga tila Betleem ga gid
tuanga boloma ngan, ta
tipamate gid gergeu
arangaranga toa ngada
oa ad rai rua ga isulug.



Ei imata nanan gid
kapepei oatainga ad led
posanga ngan gigima ele
otnga, ta iuade gid gergeu
ad rai toa bedaoa.





Idio ta Erot imate, be mole
mao angelo ton Maron ila
Isip ta iuot pan Iosep ngan
anun ta ikeo, "Eao dae ta
bada gergeu toman ngan
itna ta aluagimi ga ala
ngan tibur Israel.
Ngansa gid panua toa
tiuangga tipamate

gergeu ne,
timate na."



Be Iosep ilongo
mambe Arkelaus
ibada itama Erot imul
ta iman maron kapei
togid Iuda,



tota imataud ngan
langa toa eoa. Be ngan Iosep
ianun, Deo ipabib ele, ta ila imado
ngan tibur Galili ngan tuanga Nasaret.



Kadonga toa ne iuot ta
iparangrang posanga
ede gid panua tibada
Deo iaoa mugaeai
tikeo ngan ga
bedane,



"Gid ga tiuato ei
eaba Nasaret aea."



Ngansa Deo ilolo ikim tau panua toa
ngada ne tanoeai, ta ilongean Inat toa
kelede oa, ta oangga sai ilolo matua
ngan ei, eine ga irangrang ngan
iduaea mao. Be ei ga ibada
madonga kemi somisomi
ga ilalala
ga ila.



Rom 3:23

Ngansa panua toa ngada ne tikado kadonga sat, ta tisapir ngan madonga kemi toa Deo ele tarangai.

Rom 6:23

Ngansa kadonga sasat aea kolina ila pagimi eine matenga. Be Deo ele tenainga ila pagimi eine madonga kemi somisomi ga ilalala ga ila. Tenainga toa ne inam pagita ngan leda lupnga toman ngan Iesus Kristus ada Maron.

Ibru 9:27

Panua toa ngada ne manta timate pakelede, ga kus ta tila timadid ngan posanga toa Deo imatai.



Epesus 2:8,9

Ngansa ngan ele kadonga lolo marum aea kekelen, Deo ibada gimi mulian. Gimi akado danga eta ngan luanga gimi mulian mao, be Deo ibada gimi mulian mambe ele tenainga ila pagimi. Lemi kadonga lolo matua aea eine mambe edap tenainga toa ne ila pagimi ngan. Kadonga toa ne iuot ngan gimi lemi naurata mao. Deo kekelen ikado, ta irangrang ngan eaba eta iparim ngan ei mulian mao.

Rom 10:9,10

Posanga toa ne ga bedane: Oangga eao posa masaeai ngan aoam ta keo ga, "Iesus ei Maron," ga eao lolom matua mambe Deo ipei ei mulian ngan ele matenga, eine ga Deo ibada go mulian. Ngansa kadonga lolo matua aea ienono lolodai, ta kadonga toa ne ikado ga taot tutui Deo imatai. Be ngan aada, taposa masaeai toa bedaoa, ta Deo ibada gita mulian.



Ioanes 3:16,17

"Ngansa Deo ilolo ikim tau panua toa ngada ne tanoeai, tailongean Inat toa keledede oa, ta oangga sai ilolo matua ngan ei, eine ga irangrang ngan iduaea mao. Be ei ga ibada madonga kemi somisomi ga ilalala ga ila. Ngansa Deo isula Inat ga inam tanoeai ngan panasnga gid panua mao. Be isula ei ga inam ngan badanga gid mulian."

1 Ioanes 5:11-13

Be posanga toa Deo ikado ne, eine ga bedane: Deo ibada madonga kemi somisomi aea pagita. Be madonga kemi toa ne inam pan Inat. Eaba sai toa ibada Deo Inat, ei ibada madonga kemi toa ne. Be eaba sai toa ibada Deo Inat mao, ei ibada madonga kemi toa ne mao. Gau nabode gid posanga toa ne ga ila pagimi panua toa lolomi matua ngan Deo Inat ieda, ngansa nakim aoatai kemi mambe gimi abada madonga kemi somisomi ga ilalala ga ila.



Mateus 1-2; Lukas 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter; Sarah S.

Bariai Bible (bch) © 2012, Wycliffe Bible Translators,
Inc. All rights reserved.

<https://live.bible.is/bible/BCHWBT/GEN/1>

©2026 Bible for Children, Inc.

www.M1914.org

www.bibleforchildren.org

